

Hakikat Keimanan Kita Kepada Islam

Ucapan Tuan Syed Nasir bin Ismail, Yang Dipertua Jamiyah al-Da'wah al-Islamiyyah, Selangor di pembukaan

Mesyuarat Agung Jamiyah dan upacara merasmikan Kursus Kader Dak'wah Islam di Dewan Syarahan Masjid

Jamek Bandar, Jalan Mountbatten, Kuala Lumpur, pada pukul 10.00 pagi hari Ahad 2 haribulan Jun, 1968.

Saya mengucapkan setinggi-tinggi syukur ke hadrat Allah *Subḥānahu wa Ta 'ālā* kerana telah membuka hati kita sekalian berkumpul di sini menegakkkan pengajaran Islam dan mengucapkan berbanyak-banyak terima kasih kepada tuan-tuan dan puan-puan, terutama Yang Amat Berhormat Dato' Harun, Menteri Besar Selangor dan Penaung Jamiyah, kerana dapat melapangkan masa untuk hadir di upacara ini.

Agama Islam seperti yang telah sama-sama kita maklumi, ialah agama peraturan yang mengatur kehidupan manusia untuk kebaikan dan kebijakan dunia dan akhirat. Satu konsep Islam yang telah umum diketahui dan diakui kebenarannya oleh manusia – baik yang beragama Islam atau tidak – ialah tentang perimbangan antara kepentingan rohani dan kepentingan jasmani. Seperti kejadian diri manusia itu sendiri yang terdiri dari jasad dan roh, demikianlah juga kehidupan manusia itu; keruntuhan dan keselamatannya bergantung kepada peraturan-peraturan yang menjaga kepentingan kedua-dua unsur kejadiannya yang terdiri dari jasad dan roh itu. Alam ini, cakerawala, semesta ini seluruhnya adalah dijadikan oleh Tuhan untuk kepentingan hidup manusia.

Bagaimana manusia mempergunakan alam ini adalah penting untuk menentukan kebahagiaan atau kehancurnya. Bila konsep perseimbangan antara

kepentingan kebendaan dan kerohanian tidak terpelihara lagi maka akibatnya nyatalah keruntuhan.

Pada masa-masa yang lalu kita mengamalkan konsep-konsep Islam yang rohaniah lebih daripada kebendaan, sehingga perimbangannya tidak tercapai dan kerana itu kita mendapati diri kita menghampiri kehancuran dalam kehidupan duniawi. Apabila tamadun Barat yang mengutamakan kebendaan lebih dari kerohanian membanjiri kehidupan dan cara berfikir kita maka kita sekarang beransur-ansur pula menuju jurang yang satu lagi di mana kehancuran dan keruntuhan yang lebih buruk menanti kita. Keruntuhan rohani dapat dilihat di mana-mana dalam kehidupan kita di negeri ini. Keimanan orang Islam kepada Tuhan makin lama makin kelihatan dan kedengaran seperti lakonan atau yang berupa ucapan-ucapan sahaja. Banyak orang yang melakukan lakonan Islam dalam berbagai temasya, upacara dan sebagainya tetapi tidak banyak kita lihat konsep peraturan hidup Islam **diamalkan** dan **dilakukan** dalam kehidupan yang sebenarnya. **Melakukan** di dalam hidup dan **melakukan** di dalam upacara adalah dua perkara yang berbeza seperti langit dengan bumi.

Hakikat keimanan kita kepada Tuhan dapat dilihat dalam perbuatan dan perlakuan hidup kita. Kalau perbuatan dan perlakuan kita di dalam

lapangan hidup masing-masing tidak memancarkan hasil dari konsep-konsep Islam yang menegaskan perseimbangan di antara rohani dan jasmani maka lakonan dan ucapan yang kita lakukan dan kita ucapkan di upacara itu tidaklah bererti.

Saya suka menarik perhatian tuan-tuan dan puan-puan kepada zaman yang kita hidup sekarang. Kita sekarang hidup dalam satu zaman yang dinamakan Zaman Nuklear, Zaman Angkasa lepas di mana kebudayaan dan fikiran manusia dibentuk oleh tamadun ilmu sains dan teknik. Dalam dunia sains dan teknik ilmu tentang kebendaanlah yang besar pengaruhnya. Hal-hal yang mengenai kejiwaan, mengenai rohani dan perasaan menjadi longgar dan kadang-kadang diaibaikan.

Kebahagiaan hidup dalam pemikiran sains dan teknik ialah kelengkapan segala alat yang memudahkan manusia untuk bergerak dan bertindak. Alat-alat kemudahan ini makin lama makin maju hingga akan tiba masanya di mana manusia tidak perlu bergerak dan bekerja lagi. Segala sesuatu akan dijalanka oleh alat-alat yang dicipta dari pemikiran sains dan teknik. Sekarang sahaja sudah ada ahli-ahli fikir berpendapat bahawa dengan perkembangan sains dan teknik yang tidak terkawal manusia telah merendahkan dirinya dari darjah sebagai manusia. Makin lama sains dan teknik

Hakikat Keimanan . . .

makin merupakan saingen kepada ketuanan manusia. Manusia makin terjerumus untuk menjadi hamba kepada benda-benda dan alat-alat yang diciptanya sendiri.

Pada suatu peringkat hasil sains dan teknologi membantu manusia tetapi pada peringkat yang lain bila manusia tidak lagi mempunyai kekuatan batin dan rohani maka sains dan teknologi itu akan memusnahkan manusia.

Seluruh dunia, termasuk kita sendiri, sekarang menghadapi kemungkinan-kemungkinan ini. Oleh sebab itulah seluruh dunia mula memikirkan soal-soal rohani dan jiwa. Manusia tidak boleh dibiarkan terus menjatuhkan darjatnya sehingga menjadi hamba kepada ciptaan-ciptaan. Kita orang-orang Melayu sudah mempunyai pengalaman yang kecil di dalam pertentangan antara kebendaan dan kerohanian ini. Kita hampir-hampir sekarang ini kalah kepada keadaan yang memikirkan bahawa wang adalah segala-galanya di muka bumi ini. Kerana wang kita boleh merendahkan darjat kita sebagai manusia. Boleh, maaf-maaf cakap, turun ke darjat haiwan. Ini baharu berhadapan dengan pengaruh sains dan teknik yang kelak akan mempengaruhi kehidupan kita juga.

Saya mempunyai keyakinan betapa pentingnya pendidikan agama, pendidikan rohani, diperluas dan dipermaju. Tetapi bukanlah untuk menentang sains dan teknik sebab memang sains dan teknik berguna untuk dijadikan alat bagi kemudahan-kemudahan hidup manusia. Sebaliknya ialah untuk menanamkan benih-benih

peri kemanusiaan, menanamkan keimanan dan menumbuhkan kesucian rohani yang kelak dapat menghadapi pengaruh-pengaruh kebendaan yang boleh menyelewengkan tujuan-tujuan sains dan teknik itu daripada menghambakan manusia kepada diperhambakan oleh manusia. Darjat manusia mestilah selamanya dipertahankan supaya ia jangan dijatuhkan oleh ciptaan-ciptaan sendiri. Dan ini hanya dapat dilakukan kalau manusia itu bersih rohaninya serta teguh imannya kepada Tuhan.

Saya katakan ini kepada tuan-tuan ialah kerana ada hubungannya dengan perjuangan kita sebagai orang-orang yang menyatukan diri di dalam gerakan da'wah Islam.

Da'wah Islamiyyah sekarang bukan lagi da'wah untuk memperbanyak ibadah semata-mata tetapi da'wah untuk menegakkan nilai dari konsep-konsep Islam tentang moral dan akhlak, tentang kerohanian dan kejiwaan yang telah mula dilanggar dan menghampiri kehancuran oleh kepentingan-kepentingan kebendaan.

Nilai-nilai kebendaan, nilai-nilai kepentingan jasmani nyata di mana-mana mengambil tempat yang utama dalam kehidupan umat kita hari ini.

Apa yang selalunya dianggap salah dari segi nilai keagamaan dan nilai kesopanan, umpamanya, sekarang masih dianggap sahaja sedang kesalahan itu tetap berlaku dengan sewenang-wenangnya. Inilah tanda bukti bahawa nilai kebendaan telah mengalahkan nilai kerohanian. Nilai-nilai itu tinggal dalam **anggapan** sahaja tidak dalam **amalan**.

Kita dapat melihat betapa perlumba-lumba manusia dari berbagai lapangan hidup, dari pucuk hingga

ke akar masyarakat, yang beragama Islam atau tidak, sekarang ini sedang berlumba-lumba mengejar apa yang dikatakan kemewahan dan kemakmuran. Memang mengejar kemewahan dan kemakmuran dikehendaki oleh agama Islam tetapi seperti dalam apa usaha pun konsep-konsep dasar agama itu – dalam hal ini konsep mengimbangkan keperluan rohani dan jasmani – mestilah tetap dipatuhi. Nilai-nilai yang ditimbulkan oleh konsep dasar itu mestilah menjadi ukuran dan neraca.

Sekarang ini masyarakat kita hampir-hampir melupakan ukuran dan neraca nilai-nilai itu. Kekayaan, kekuasaan ilmu pengetahuan digunakan untuk mengejar kemakmuran dan kemewahan dengan nilai-nilai baharu yaitu kebendaan semata-mata. Bahkan kalau kita perhatikan betul-betul kemiskinan dan kemalaratan pun digunakan untuk menggugat dan menuntut dengan menggunakan nilai-nilai baharu itu, yakni nilai kebendaan semata-mata.

Apakah yang akan kita peroleh dari keadaan seperti ini? Saya rasa tidak lebih dan tidak kurang ialah keruntuhan dan kehancuran. Bukan keruntuhan moral seseorang sahaja tetapi keruntuhan satu bangsa dan satu negara pun mungkin kerana nilai-nilai kebendaan yang mengalahkan nilai-nilai kerohanian itu telah mulai menjadi pegangan dan amalan umum.

Apa yang saya nyatakan ini adalah gambaran betapa nilai-nilai hidup kita telah berubah dan betapa perubahan itu berputar 180 derjah dari nilai rohani semata-mata kepada nilai-nilai kebendaan semata-mata.

Da'wah Islamiyyah sekarang ini

Hakikat Keimanan . . .

berhadapan mata dengan mata, muka dengan muka dengan keadaan itu. Maka saya berpendapat dan saya berharap kita yang menggabungkan diri di dalam gerakan da'wah Islamiyyah ini mengerti dan faham akan tugas kita.

Kita bukanlah ditugaskan oleh agama untuk menentang kemajuan alam, kerana kemajuan alam itu diusahakan oleh manusia yang memang disuruh oleh Allah dan rasul-Nya untuk mempergunakan segala isi alam yang dijadikan Tuhan ini untuk menyempurnakan kehidupan. Tetapi kita adalah bertanggungjawab mengembalikan manusia kepada kebenaran, kepada

konsep-konsep dasar agama dan kepada nilai-nilai hidup yang seimbang di antara kerohanian dan kebendaan. Janganlah manusia menjadi hamba kepada kebendaan, kerana sebaliknya benda-benda di alam ini dijadikan untuk menjadi hamba kepada manusia.

Jamiyah al-Da'wah al-Islamiyyah Selangor sangat memandang berat atas hal ini, maka oleh kerana itu salah satu dari acara kita hari ini ialah melancarkan gerakan Kursus Kader Mubaligh. Tujuannya ialah untuk menyediakan mubaligh-mubaligh yang terlatih yang akan bergiat dalam lapangan da'wah, lapangan membimbing kembali manusia dalam masyarakat kita ini kepada konsep-konsep dan nilai-nilai agama. Konsep dan nilai-nilai hidup yang akan memimpin

manusia dari pucuk hingga ke akar masyarakat kita kepada keselamatan dan kesejahteraan.

Mudah-mudahan dengan kerjasama kita semua dengan bantuan segala lapisan umat di negeri ini akan lahirlah orang-orang yang terlatih dan mempunyai ilmu pengetahuan serta bersifat *siddiq* (benar), *sa'ānah* (bijaksana), amanah dan tabligh untuk menjalankan kegiatan da'wah Islamiyyah yang ditujukan kepada membimbing manusia kembali kepada konsep-konsep dan nilai-nilai agama. Kalimah "Lā ilaha illā Allāh" tidak akan dapat ditegakkan selagi kita tidak menegakkan kembali nilai-nilai dan konsep-konsep agama yang menjadi tiang keimanan kepada Allah.



Yang Mulia Tuan Syed Nasir bin Ismail – Yang Dipertua Jamiyah al-Da'wah al-Islamiyyah – Selangor sedang berucap di dalam Mesyuarat Agung yang telah diadakan oleh Jamiyah pada 2 haribulan Jun 1968 yang lalu.